

Kabinet belum memutuskan peratus peningkatan bagi kakitangan awam.

# KAJIAN NAIK GAJI SIAP AKHIR TAHUN

11.17 SEP 1991

(D)

**S**UBANG 16 Sept. — Perdana Menteri, Dato' Sri Dr. Mahathir Mohamad hari ini berkata, kabinet akan berusaha untuk menyiapkan kajian mengenai kenaikan gaji kakitangan awam secara menyeluruh sebelum akhir tahun ini.

Bagaimanapun menurutnya, peratusan kenaikan gaji yang akan diberi kepada 885,000 kakitangan awam itu belum diputuskan lagi dan tidak menolak kemungkinan keputusan mengenainya akan mengambil masa yang panjang.

Beliau menjelaskan, walaupun kajian pelarasan gaji yang sedang dijalankan itu sudah sampai ke peringkat akhir tetapi ia adalah kompleks.

"Memang kajian ini sudah sampai ke peringkat akhir tetapi kadangkala peringkat ini pun boleh mengambil masa yang panjang," katanya kepada para pemberita semasa mengulas tentang perkembangan kajian tersebut.

Beliau menyatakan demikian di Lapangan Terbang Antarabangsa Subang di sini hari ini sebelum berlepas ke Mexico untuk lawatan rasmi selama enam hari.

Perdana Menteri berkata, pelarasan gaji adalah satu kerja yang kompleks dan ia memerlukan masa yang panjang untuk menyelesaikannya.

Dengan pelarasan itu, kakitangan awam akan menikmati peratusan kenaikan gaji yang berbeza mengikut tanggaji masing-masing iaitu berdasarkan kaedah "mencukupkan kenaikan" (*topping up*).

Ditanya tentang peratus kenaikan yang dicadangkan, beliau berkata: "Kita tidak boleh bagi tahu, lagipun kabinet belum mempersetujuinya."

Pada 23 Januari lalu, Perdana Menteri telah mengumumkan kenaikan gaji sebanyak lima peratus kepada semua kakitangan awam dalam pelarasan gaji sementara dan kenaikan itu melibatkan perbelanjaan tambahan kerajaan sebanyak \$400 juta.

Pelaksanaan sementara itu berkuatkuasa mulai 1 Januari 1991 dan ia turut meliputi kakitangan-kakitangan bertaraf sementara.

Sementara itu Menteri Kewangan, Dato' Sri Anwar Ibrahim ketika ditemui di tempat yang sama menjelaskan, Jawatankuasa Mengkaji Pelarasan gaji sedang memberi perhatian serius untuk menyiapkan kajian dengan secepat mungkin.

Menyentuh tentang lawatan Perdana Menteri ke Mexico, Dato' Sri Dr. Mahathir menjelaskan, beliau akan mendapatkan keterangan lanjut daripada Presiden Carlos Salinas de Gortari berhubung dengan cadangan menubuhkan Perjanjian Zon Bebas Amerika Utara (NAFTA).